

大明大聖至德至靈麻溪四目老翁感應慧通
張僊大真人注生延嗣真經

凡人祈嗣須擇靜室滌除塵垢默坐澄心
捧誦此經先念焚香咒次淨口咒次開經
咒至誠朗誦儼然

僊翁臨之在上神明鑒祐滅罪消愆桂子蘭孫
陰空送至如響應聲

焚香咒

金爐瑞藹

寶篆祥騰

精誠貫徹

和氣薰蒸

仙真休享

早產寧馨

充閭跨竈

俾爾繩繩

淨口咒

咨爾玄膺

大道傳宣

心聲渙發

徵顯闡玄

秉虔諷誦

上徹九天

衆神拱聽

莫溷真詮

開經咒

頂禮上界尊

皈敬開天祖

人間大不孝

無後人生苦

今持妙應經

種德慙無補

太上廣慈悲

錫我丞嘗主

皇王玉陛體仁元君張仙真人說注生延嗣妙
應真經

爾時

玉皇天尊在浮黎空境鬱羅洞天觀無極世
界見無量衆生有受富貴康寧子孫膝遶
金紫肩摩者亦有業累萬金官榮數世後
來繼世不續宗祀無承者有受貧窮苦楚
孤獨零丁形影子立者亦有家無儋石地
鮮卓錫後來子姓昌大數葉不衰者萬有

不齊是雖前世來因亦繇今生作造

天尊劑量大生愍念哀此瑩獨乃降玉音宣召
歷劫遐邇至真仙衆雲駢鶴馭浮空而來
俯伏瑤臺誓首聽命維時

張仙真人越班而出長跪上白而言

天尊大慈天尊大聖諸天之父衆真之祖恩覃
萬類澤沛九垓上天下地往古來今色色
形形生生化化無有紀極無有盡藏今此
下民老而無子孽繇自作悔不可追伏望

廣布好生之大德照原無後之頑愚宥其
往愆示之生道使人人有後代代相承臣
不勝懽幸不勝懇願

天尊言蠢爾衆生莫知至道道生天地天地妙
合二五儲精成男成女至秀至靈盈天地
間若有知若無知若有情若無情皆從不
有中有不形中形惟人最貴反罹孤惻此
何以故吾爲爾說爾當諦聽

天尊言人生在世乾父坤母陰受陽施氣稟清

濁男女異資賢愚貴賤造物攸司厥初生
民媁遇有時天然節制准以信期多生男
子聖哲胚基所以聖人不屏男女之慾惟
循人道之宜降及後世情竇日開風氣日
漓非時淫縱任意妄爲元精耗竭欲熾神
疲或裸露星月或穢觸神祇或三元正臘
或四絕四離或晦朔弦望之日或疾風暴
雨之時不知禁忌大則絕嗣生必愚癡其
有內多嫉妒妾媵不容河東獅吼以致滅

宗不孝之罪上與天通似此衆生

太上不疇

天尊言世有夫婦於其婚配或犯咸池或罹華
蓋或坐三刑或招六害孤陰寡陽天羅地
網命宮所載嗣續艱難自生怨艾是雖氣
數之適然亦或天心之有在於是

張仙真人領聞玉音作禮長跪上白而言

天尊大慈天尊大聖廣度衆生衆生父母臣觀
下界有等無後者皓首無依空悲日暮舉

目誰親病來疇顧獨對孤燈涕淚交注太
息呼天天高難訴一日無常空拳歸路骨
肉未寒家資殘破柩返夜臺誰歌薤露
太上駕慈航願爲衆生渡

天尊言希有真人善哉善哉爾今名高玉籍位
列瓊宮上應張宿典司化權佑南斗而注
生判桂祿以翊運尋方顯化行著勲崇吾
昔於大羅天境念未來世一切凡夫之人
以哀憫心發廣大願演此妙應真經若有

善男子善女人欲求嗣者每於朔望本命
甲子庚申持齋虔禮諷誦此經自然居室
懽和精精神完暢祥光馥郁瑞氣氤氳當有
九天監生高元帥招神攝靈篤生佳胤比
及生產太乙在門司命在庭或有凶厄諷
誦此經卽得九天衛房聖母元君陰空抱
送臨盆有慶子母無虞嬰孩在於襁褓之
中爲父母者有能考據十變五蒸之期焚
香祈禱持誦此經卽得五臟六腑長養和

平胎毒潛消痘疹稀少關煞不侵如欲聰明智慧壽命延長本命生辰宜誦此經諸所利益福德無量爾乃遊行寓內遍歷十方爲人演說佑啓善良鍾奇孕秀遂產英豪綿綿瓜瓞蟄蟄螽斯爾此福德勝他福德諸天聞已衆真咸悅於是

真人拜命領受化誘愚迷弘宣十戒

一戒宰割之惡

邛人杜章躬親烹割膾炙不離貧無資身屠創就食取過命之錢卽爲操刃見飛走之物遂萌殺心五子手無一指癩疾體無完膚乃遣功曹使手揭瘡皮而自食指染濃血而吮味爲殺生戒

一拜

二戒盜竊之惡

有女人楊靚中適寒士雍有卓夫亡姑老矣不他適斷髮毀容女工給養姑死禮葬鄰里助金盜竊而去乃遣陰兵執盜于市

口稱楊節婦物悉當還之舉手向口十指
嚙盡爲殞賊殺

二拜

三戒酷取之惡

蜀江王仔承檄督鹽強民倍課乃陰治之
示夢主者仔生牛尾產於田氏果變爲牛
益昌馬諤出郡督錢必期多得人甚苦之
號曰馬刷聞于

上帝暴病而死棺內有聲已變爲猪爲誅暴戒

三拜

四戒淫汙之惡

李貴少年首領鄉薦後漸不第貴自薦後
非窺人之女而陷其父卽淫人之妻而罪
其夫長惡不悛今已削籍貴卽悔死爲明
威戒

四拜

五戒口舌之惡

祝期生者生有口才日習汙下譏良訕善

謗富侮貧攻發陰私暴揚小過教人詛訟
訶詆幽明乃命功曹手探舌出指爪犁之
涎血淋漓宣告諸人口業莫作舌枯而死
爲口業戒

五拜

六戒工匠之惡

黎永正者爲斗斛權衡取人倍直入大出
小減輕爲重作空中懸絲之秤爲折底隆
梁之斗里神示夢楚撻不悔復瞽其目妻

棄他適二子亦盲手指傷殘骨節零落行
哭於市暴過而死爲東郭戒

六拜

七戒忍親之惡

蜀人王千父母買香木棺以備身後千易
杪木而貨之又易株板留以自用松棺葬
母子察知之雷擊千死倒置其屍又羅鞏
者身入上庠過祠祈夢予告以獲罪天曹
子宜亟歸前程勿問鞏請罪繇予告以父

母不葬子爲儒者獨任其咎輩未至家而卒爲誅逆戒

七拜

八戒棄子之惡

富室張千十約租田者八十餘家凡有生男止留一子以力耕獲千十二子長病廢疾次幼而癩予廉租民不舉之子四十餘命無歸爲崇使次子自言四十餘人索命相追千十自艾邑重人命生齒漸繁爲首

邑戒

八拜

九戒焚焰之惡

李轅至孝烹雞奉母遇客暮投不以供客恨然而去因風縱火轅負母出仰天呼號予吹氣成風反燎客鬚顛赴火中自言俠士蒲光度亡命流離今卽死矣不作無名之鬼語畢而絕爲回風戒

九拜

十戒性暴之惡

蜀有王尚忠家富無子性頗險急妾媵小過輒鞭笞之轉易之繼子違教責逐之于化居士語以學心改行濟急周窮憫孤容過三年之後必有善報尚忠警悟葬貧人父母五十餘喪成貧人男女八十餘婚三年舉子名曰神保長而克家爲北郭戒

十拜

天尊聞戒生大懽喜傳諭衆真乃加真人金闕昊天太師糾察三界兼司四方禍福真人陞辭分遣功曹隨處應變爲國宣勞扶鸞降筆垂示衆生

真人曰咨爾有衆聽予格言母欺天遠母謂神幽母言暗室可欺母道明庭不畏母凌孤寡母侮老成母取不義之財母淫非已之色母厚結他人而親戚岐路母汎交異姓而兄弟鬩牆母恃已長母攻人短母立身不正以曖昧貪饕爲能母立心不臧以

機巧變詐爲勝母面譽背毀而苟合於人
母口是心非而不容於物母外貌慈祥徒
巧言而善惑母中情狠暴好潛賊而陰謀
苟有負於吾言端不逃於天憲或覆滅宗
祀或殃及子孫惟有敬重字紙亦可克享
天心果報昭昭在人耳目如瀘州楊百行
坐經文而舉家害癩昌郡鮮賚坤殘孟子
而全家滅亡楊全喜埋字紙而五世登科
李子才葬字紙而終身貴顯若人能以字

紙或埋于土或焚于火或以之而告習後
人或以之而播諭親友自然富壽安康多
男衍慶如宋朝王沂公之父見字紙遺墜
誠心躬取香湯洗潔而焚之後夢宣尼抱
送曾參生於其家顯大門戶果生一子名
之曰曾狀元及第陰報不爽凡欲求嗣信
受奉行

真人曰吾一日上朝

玉皇見天下諸神表奏善惡押送獄司明彰報

應某人害衆成家以劫盜報某人尅取貧民略無惻隱以子窮乏報一子文才合佔解額檢籍除名某人富而不仁貪而無厭傲忽衆流以疫癘病死報甚者數人以王法流死報又有放無息錢者活及千人以子孫顯官報有散施死者棺殮病者醫藥產者餽粥用心甚廣但有作止所及未洪以子孫登第報予嘆世人迷惑善報者百無一二惡報者比比皆然終不省悟不生

善心惟知多積錢穀可以貽後不知罪惡貫盈反爲已累惟有義倉一事可以拯救貧弱計時豐歉賤糴貴糶不取子錢互有所濟其利甚廣行之一族或及一鄉自然後胤繁衍建立功業享有遐齡報應不爽富足有餘凡欲祈嗣信受奉行

天尊聞詰首勅真人分身應化專主嗣籍鑒察人心紀錄陰功默垂善報真人挽弓挾彈以兆懸弧誕子之祥是經在處卽有諸天

神王金剛菩薩救苦真人護法靈童隨所
侍衛

真人肅容垂拱對

天尊玉几前而說偈曰

無量至尊道 道生天地人

人不生空桑 一體分真我

姜嫄履人跡 簡狄吞燕卵

二聖啓商周 生豈不祥者

無土不生物 好花必結果

世人若無後 罪業天降禍

能生善信心 持經懺前過

天尊生慈悲 廣嗣延宗祚

真人說是偈已

天尊言此經功德不可思議若人誦之吾當呼
召三精九靈之神使六慾不生三毒消滅
身體康強子孫逢吉

天尊說是經畢十方諸真仙衆合掌讚誦咸稱
善哉善事不作何以享天善人無後何以

勸善天人交感妙應若響

張僊大真人注生延嗣真經

終